



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**  
**8 Marsu 2018**

**Timor-Leste komemora Loron Feto Internasionál ho tema nasional ‘Tempu to’o ona mai ita promove no tane aas liman badaen feto Timor’**

Iha kada lora 8 fulan-Marsu, komemora nu’udar Loron Internasionál ba Feto, ne’ebé selebra iha mundu rai-klarán. Komemorasaun lora Internasionál ba Feto ne’e ho tema global mak : Tempu to’o ona: Ativista rural no urbana transforma feto ninia moris (*Time is Now: Rural and urban activists transforming women’s lives*). Enkuantu tema nasional mak ‘Tempu to’o ona mai ita promove no tane aas liman badaen feto Timor’.

Komemorasaun lora Internasionál ba Feto nu’udar momentu importante tanba kontinua relembra movimentu, esforsu no komitmentu global atu rekoñese feto nia luta no enkoraza partisipasaun ema hotu hodi promove igualdade entre feto no mane. Esforsu hirak ne’e ikus mai hetan ona progresu signifikaativa ba estatutu feto iha mundu tomak no partikularmente iha Timor-Leste, mezmú sei iha nafatin servisu barak atu halo.

Komemorasaun ne’e ho objetivu atu atinji igualdade jéneru no hakotu diskriminasaun ba violénsia hasoru feto nomos asegura oportunidade no partisipasaun hanesan iha aspeitu hotu-hotu ba iha dezenvolvimentu nasaun nian.

“Estadu Timor-Leste liuhosi instituisaun relevante sira halo ona esforsu oin-oin, atu dezenvolve feto no enkoraza partisipasaun feto iha aspeitu hotu-hotu. Mezmú nune’e, feto no labarik feto barak mak sei kontinua luta atu hakotu korente violénsia doméstika, violénsia seksuál no abuzu seksuál hasoru feto no labarik sira, no diskriminasaun ho forma oin-oin ne’ebé sira hasoru,” dehan Luis de Oliveira Sampaio, Diretór Ezekutivu JSMP

Iha ámbitu komemorasaun lora importante ne’e, JSMP hanoin katak nu’udar mós oportunidade ne’ebé oportunu hodi reflète fali mudansa ne’ebé feto sira atinji ona. Aleinde atu hare ba realidade atuál esperensia feto sira ne’ebé kontinua enfrenta dezafiu violénsia oin-oin. JSMP ninia estatistika monitorizasaun tribunál sira rejista forma violénsia oin-oin hasoru feto no labarik feto sira. Tendénsia violénsia hirak-ne’e regular liu mak violénsia doméstika, violasaun seksuál, abuzu seksuál kontra

labarik fetu sira, abandonu inklui krime ho natureza inestu sira. Krime hirak ne'e potencialmente sei prejudika tebes fetu sira nia vida normal hanesan ema no impede sira nia oportunidade atu goja sira nia direitu hanesan ema iha nasaun demokrátiku ida hanesan Timor-Leste.

Iha tinan 2017, JSMP monitoriza kazu 537 ne'ebé envolve violénsia bazeia ba jéneru ne'ebé atinje porsentu 65% husi kazu kriminál hamutuk 829. Hosi krime hirak ne'e porsentu 72 (72%) mak nu'udar violénsia doméstika, no porsentu 5 envolve violénsia seksuál. Porsentajem ne'e ladook malu hosi estatistika kazu ne'ebé JSMP monitoriza iha tinan 2016 ne'ebé atinze porsentu 62 (62%) hosi total kazu kriminal 941, no kazu violénsia doméstika atinze porsentu 65 (65%) no maizumenus porsentu 9 (9%) mak envolve kazu violasaun seksuál. Dadus hirak-ne'e, hatudu katak kazu envolve violénsia bazeia ba jéneru kontinua aas iha tribunál sira.

JSMP apresia esforsu hotu-hotu ne'ebé Estadu halo liu-hosi polítika oin-oin atu promove igualdade jéneru no polítika lejislativu atu proteze fetu no labarik fetu hosi violénsia. Maske nune'e JSMP nafatin enkoraza entidade hotu kontribui hodi dezenvolve promove politika toléransia zero ba violénsia hasoru fetu no labarik iha sosiédade. JSMP espera katak komemorasaun Loron Internasional ba Fetu ne'e la'ós aktu serimoniál de'it, maibé nu'udar komitmentu kolektivu no institusionál ida atu luta hodi hakotu violénsia hasoru fetu no labarik fetu sira iha Timor-Leste.

Relasiona ho komemorasaun loron importante ne'e, JSMP aproveita hodi kongratula fetu hotu iha mundu, liu-liu fetu no entidade sira iha Timor-Leste ne'ebé iha korazen atu kontinua luta hodi defende fetu sira- nia direitu no luta ba lia-loos ho justisa.

Atu hetan informasaun kompleitu bele kontaktu ba:

Luis de Oliveira Sampaio

Diretór Ezekutivu JSMP

E-mail: [luis@jsmp.tl](mailto:luis@jsmp.tl)

Telefone: 3323883 | 77295795